

四庫全書

集部

欽定四庫全書

石倉歷代詩選卷二百二十四

明 曹學佺 編

宋詩一百一

白玉蟾

妾薄命

妾居西北方容貌亞冰雪妾長嗟無媒孤影對明月頭
綰墮馬髻脚襯凌波襪釵梁溜金鳳舞帶蒙錦纈頸瑳

素玉圓胸瑩新酥滑翠靨中娥眉瑤花彈鴉髮腰裊柳
絲輕臉潤桃花發出郊乘紫騮蔽目舉青繖不敢一回
首煙際暗愁結誰家白面郎志氣何飄揚使妾一過眼
吾肉燔如湯自惟父母嚴折花回倚墻

寒碧

清秋訪林館寒碧凝瑤風冷入琅玕聚涼生瑤玉叢枝
枝撐明月葉葉起清風朝雲掛餘翠夕照搖殘紅斷鴉
噪方宿鳴鳳棲復沖扶疎玉梵府折菽水晶宮露花滴

翡翠煙絮纏蛟龍萬竿響笙竽一林撼絲桐飲罷身欲
蛻聯鑣翔太空

樓前雨霽

飛廉驅鐵騎萬雨飛落地煙淡松鬱蒼風起竹似醉倚
窗橫膝琴政有作詩意白鳥忽飛來點破一山翠

鶴林賞蓮

玉洞生翠霧瑶林映素霞天飛明月英夜浴白蓮花碧
水香以淨松聲吹露華衆仙鸞鶴散寂寂五雲家

春日道中

春光入萬象天意開百花鶯雛戲雲錦鳩婦絡雨紗曉
日晴弄柳夜雷暗驚茶溪帶縛洞口醉歸蜂正衙

僕鶴

白雲無消息黃鸝杳不歸華表風露冷臨臯星斗稀不
念桑田變但向瑤臺飛盍不下來乎翩然點翠微

秋宵辭

秋色何淒淒奈此可憐宵銀河望不極萬籟涼蕭蕭雲

花遠縹緲月影寒寂寥一鴈蹲滄洲羣螢飛斷橋仰盼
蒼松枝黯然不自聊

其二

月華明如許秋色清可掬小立西湖道瀟漫芰荷綠人
生祇幻夢造物不可覆英雄受淒涼嬌駭飽梁肉湖山
却見知對人長青目

其三

清秋薄湖山蒲柳生寒煙悵望荷花中誰家鳴管絃豈

復念伊人孤影芙蓉邊吸風咀月露照水時自憐暗懷
夜光寶長吁不成眠

其四

空山寂無人出門但明月悲哉誰與論對此一愁絕清
露襲衣裳涼風逼毛髮淚雨忽復晴愁雲悄自滅

景泰晚眺

海岸孤絕處晴沙露遠汀潮花人髮白山色佛頭青夕
照雌黃筆秋煙水墨屏天空杉月冷鶴夢幾回醒

梅窓

南窗屋數楹一點梅花生枝上雪粧瘦牆頭風入清霜
天酒自暖月夜夢難成何處人吹笛黃昏送幾聲

杜鵑行

杜鵑哭杜鵑哭微雨村遠煙麓山花紅江楓綠一聲殘
一聲續一聲一聲復一聲不管世間銀髮生啼盡天涯
夕陽影又向空中啼月明山中顚顚人無緒傷春顏色
悲今古古今興亡電影馳臨風再拜君得知兩行茆舍

蒼煙淚滴破浣花溪上詩

周唐輔仙居莊作

黃鸝聲斷桃花飛一雨三日溪水肥
龍孫破地蝴蝶懶
梅子如豆糝青枝東風吹轉楊柳腰
村南村北杜鵑啼
稻針刺水鷗抱卵雙燕商量春欲歸
蟾溪主人折社甕
百杯醉我爛如泥翠麓軒壁凝古墨
一闕松窗傷春詞
夜來飲到嫦娥去笙鶴響空人不知
露華煙靄濕蒼蘚
朦朧沆瀣霑我衣瀑布懸珠濺紫芝
山猿恐我呼杖屨

啼到日高丈二時廬山山下一回首只是此生長別離

贈玉隆王直歲遊武當山

西山猿啼啼不已千巖萬壑綠煙起杖頭挑月過瀟湘
去飲清陽澗下水清陽澗上五龍池池邊落葉不敢飛
太玄真人去未歸七十二峰空斜暉峰頭有人名歛火
洞泉飄出松花老他年君自武當回惠我數枝石燈草

仙巖行

醉携七尺霜前竹雲錦山前灣幾曲溪頭秋雨添寒綠

蛟龍冷浸一壺玉
蓼花錦岸紅欲流
稻田高下鋪碁局
碧巖聳出碧天半
鳥不敢飛縮雙足
古洞無人石酒酢
峭壁仙倉積天粟
老稍指顧猶驚呼
神剎鬼劃出崖谷
搗藥聲乾人已僊
萬丈丹井一泓泉
風擊古松飛翠蓋
日射蒼苔鑄綠錢
藤蘿拽樹擎輕煙
黃鶴一去今何年
天欲夕陽空鳴蟬
夜深嶺月向誰圓
古寺老屋留數椽
殘僧一二掩柴門
鐵像面壁瀟瀟然
瓦爐無火古殿前
寒鴉到窗簷息溜
暮雲衰草覺山瘦
楮衾不暖不成眠

虎聲入耳猿聲又幾點疎星落梧桐丹巒紫壑高相鬪
何當汗漫誇青牛曉露泠泠白玉樓

題歐陽氏山水後

平沙斷岸幾千尺樹色煙光渺無極一葉扁舟歸去來
漁翁放棹倚蘆荻八九山家雲水村白蘋紅蓼數漁船
沙寒石瘦木葉落一鉤淡月照黃昏小橋跨水碧溪淺
蒼壁丹崖半苔蘚樵子歸擔竹兩竿落霞孤鶩天邊遠
千山萬山風色清四柱茆亭立晚汀花紅草綠山水靜

獨步亭前秋月明山前一陣梧桐雨落花驚斷山禽語
誰家樓閣隱青林老僧歸寺立溪澗一溪流水遶雲根
草舍茆菴常閉門客來倚棹一回顧直疑此是真桃源
洞門紫翠交相映林幄山屏更清勝何人作此無聲詩
展開如入溪山鏡

清勝軒夜話

殘燈結花滿堂紅酒興未已詩興濃寒雲蠹星瑣翠空
一林幽竹夜呼風逸士倚樓嘯玉龍蟬聲泣露落梧桐

把手論文開心胃更漏相催話未終香篆飛蛇穿簾櫳
隣雞喚曉何處鐘摩挲醉眼欄干東茶鐺無火召玉童
三尺芒鞋七尺筇踏破青山綠幾重

夜宴清勝軒醉吟呈倪梅窗吳道士隱南

山前浩歌覺聲乾長嘯直入碧雲闌梅窗主人携百壺
一夕談話秋雨寒燈紅吐出玉蟲巧道人大嘯拍牀吼
連榻隱南吳庚契要看紙上生蛇走停盃撐腸發詩顛
橫捉二筆半欲眠笑把崑崙醪滄海寫出新詞數萬編

慵菴

絳闕清都舊姓名此生落魄任天真橫窗古硯前朝水
掛壁閒琴幾日塵幽草不鋤浚石靜落花頻掃襯苔勻
倩風來作闔門僕借月權爲伴酒人書史無言古滋味
闕山不動畫精神有茶不作蝸牛戰無夢可爲蝴蝶身
一得自家慵底事幽禽簷外幾般春

題丹樞先生草菴

數朶奇峰如削玉一溪秋水生寒綠幸有白雲深處朶

更兼明月壇前竹，誅茆伐竹結蘆廬。
現成山水供樵漁，隨緣隨分山中住。
收拾摩尼如意珠，草衣道人貧徹骨。
一廬瀟灑空無物，身中有寶不求人。
價大難酬不拈出，朝朝暮暮了身心。
山自開花鳥自吟，未見桑田成海水。
斜陽幾度鎖平林。

端午述懷

方瀛山上風颭颭，五月六月常如秋。
松花落地鶴飛去，萬頃白雲空翠浮。
夜半蟾蜍落丹井，琪林深鎖寒煙暝。

滿天白露點蒼苔蛙鼓沈沈萬籟靜三樹兩樹啼斷猿
樹冷棲禽夜不眠數點飛螢戀沙逕山腰石間悲寒泉
鐘聲隔斷華胥路不知蝴蝶飛何處摩挲兩眼揩紙衾
人道今辰正端午曉雨初霽梅子肥龍孫脫籜新燕飛
山居蕭然無一物葛巾羽扇搖清暉

胡東原香錦亭

東皇剖破勾芒腹錦心繡腸香馥郁絳都風雨倬僊春
花魂無主自精神黃鸝初喚柳開眼海棠枝上春煙暖

放出一點兩點紅牆頭紅腮微笑風東原去後花無主
春工亦懶施機杼亭前忽過詩酒僊花神噴出真龍涎
風催雨趲花不辦滿庭芬芳堆爛熳牡丹吐火嬌欲然
日將錦繡鋪苔氈酒酣夢與花神飲蝴蝶空庭弄花影
吟詩惆悵爲花作寂寞東原此邱壑

聽趙琴士鳴絃

我尋屏跡到猿啼雲滿山前花滿谿高峰壁立七十二
風生兩腋天爲梯練師兩鬢東風黑紺空不流月光白

簷牙咬雨昨已晴松屋張空夜琴瑟興濃抱石玄以輕
得意七絃橫玉繩膝頭指弄響玲玲燦然奪目三十星
初如雨滴芭蕉夜久坐梧桐猿嘯罷宛然幽澗聽鳴泉
偶雜脩篁夏清夏先疑易水渡荆軻已轉似勸無渡河
塞頭夜卧蘇武服塚間月照明妃哭又非牀下感蠨蛸
更似胡笳叫晚秋自然雁聲下遙塞忽覺蟬噪過南樓
君休彈終我畏聽滿懷今古興亡病蒼梧雲愁虞舜遠
鼎湖龍去軒轅冷一聲一聲復一聲柳花霏霏滿江城

城外海棠紅淚傾恐君餘思更未已爲我春晝聞晴鶯
贈蓬壺丁高士琴

瓠巴騎鯨上天去伯牙成連亦千古淺世斷無鍾子期
絃中妙意爲誰舉春風春雨滿瀟湘人在蓬窗閉竹房
竹裏鶻啼喉舌冷花間鶯宿夢魂香客從清沅下衡岳
滿懷詩愁無處着請君拂去水晶塵淪茗擎甌撫然作
道人聞予若爲情伊絃淒兮予莫聽一春十病九困酒
三月都無二日晴世間雞蟲互得失誰解牧羊坐花石

輸君朝朝在翠微鶴已睡去人不知笑思今古一俯仰
彈到千山月落時

謁仙行贈萬書記

蠅管飛葭方孟喬青女仍前夜行惡連日東風生峭寒
黃鸝聲斷梅花落客來武夷訪靈蹤八字洞門無鎖鑰
溪頭昨夜添新雨桃片滿溪紅灼灼蒼苔滿地空綠勻
芳草無言煙漠漠搗藥聲乾丹井寒虹橋一斷收霞幕
千古松風學鳳笙向晚清容滿林壑山光不動舊松竹

洞中慘慘悲猿鶴，機巖學館空無人。
紫嶺丹邱久蕭索，霧暗平林虎長嘯。
碧潭生花老龍躍，峭崖飛鳥不敢過。
萬丈蒼瓊真峻削，山中金蟾不可尋。
石邊且取黃芝嚼，我生逍遙事落魄。
泉石煙霞得真樂，身披綠麻戴青葛。
橫擔碧藜躡芒屨，只愛山林厭城郭。
却厭膏粱愛藜藿，冷眠石上入華胥。
夢見太虛無斧鑿，竭來洞中未半餉。
轉盼又覺經旬朔，今朝雲頭雨收脚。
欲歸又被溪山縛，擬作此地三間茆。
朝餐紅霞暮飲瀑。

茶歌

柳眼偷看梅花飛
百花頭上東風吹
壑源春到不知時
霹靂一聲驚曉枝
枝頭未敢展鎗旗
吐玉綴金先獻奇
雀舌含春不解語
只有曉露晨煙知
帶露和煙摘歸去
蒸來細搗幾千杵
捏作月團三百片
火候調勻文與武
碾邊飛絮捲玉塵
磨下落珠散金縷
首山黃銅鑄小鐺
活火新泉自烹煮
蠨眼已沒魚眼浮
飈飈松聲送風雨
定州紅玉琢花甕
瑞雪滿甌浮白乳
綠雲入處生香風

滿口蘭芷馨無窮兩腋颼颼毛竅通洗盡枯腸萬事空
身輕便欲登天衢不知天上有茶無

秋日有懷

一點秋光寄畫圖秋來吟髯益蕭疎晴煙染樹看何足
缺月梳雲狀不如暑退涼生蟬有韻水長天遠雁無書
此心直欲鵬南舉不學蜘蛛結網居

柳塘送春

急雨將雷過柳塘春因底事亦歸忙經時不放荷花葉

昨夜盡收梔子香判斷千林成夢去安排一夏納風涼
開眉無覓愁來處數筆晴雲盡水鄉

夢中得五十六字

醉醒曳杖訪松關正在黃昏杳靄間既去復來秋後暑
似無還有雨中山澗邊幾葉晚花落天際一鉤明月彎
自覺餘煙埋屐齒行行印破蘚痕斑

郭承務蘆雁

秋風吹落梧葉黃過雁往往歸衡陽橫空書字人不識

斷影飛過沈滄浪落霞浸水江村暮數隻翱翔回古渡
低頭引喙啄荷花飛越戍樓西畔去雲寒月淡西塞秋
幾聲淒切惹人愁

題清虛堂

月移花影來窗外風引松聲到枕邊長劒舞餘烹茗試
新詩吟盡抱琴眠酒醅初撥青螺髓香篆常燒紫馬鞭
九曲溪頭冲佑觀清虛堂裏有神仙

寓息庵送春

筆下自然詩料飽天工飭出好山溪魚知水暖不勝躍
鶯見花飛只管啼樹頭雁使婦喚雨屋後竹教孫出泥
太白十杯人酩酊碧桃洞口日銜西

天開畫樓圖

層簷疊巘入蒼冥千山萬山相送迎晴雲一抹收未了
溪尾更濯餘霞明化工朝暮費點染丹青變態隨深淺
凭欄展空千里眼却愁此軸難舒卷

天谷庵

半天突出一奇峰小小茅庵滋味濃
夾道新松招夜月滿林幽竹喚秋風
迎人野鳥間闌語惱客巖花爛熳紅
策杖且隨流水去柴門時有白雲封

題上清法堂壁

秋雨懸天風作寒冷煙鎖住屋頭山
半巖飛鳥一時過峭壁斷雲千古閒
世俗不知幽靜處神仙隱在有無間
夜來小艇篙脫手醉把霜筇入翠灣

送江子恭

春來行盡爛田畦
雲滿春空水滿溪
風漾碧波翻麥隴
日晴紅雨落桃蹊
杜鵑聲斷驚寒兔
蝴蝶夢殘聽曉雞
人在江東寄歸信
海棠花謝燕銜泥

靖通庵

靖通庵外鎖晴雲
壁瑩飛瓊兀疊鱗
野鳥無心一聲曉
巖花有意四時春
鑿開風月長生地
占斷煙霞不老身
虛靖當年仙去後
不知丹訣付何人

蒙谷

淡煙輕鎖數株松
夜靜蕭蕭古谷風
雲掩草舒青洞綠
鳥銜花落碧巖紅
神仙去後無金劔
仕宦來時有玉桐
不知此後誰人隱
寂寞南來幾朶風

雷恬真小隱送春

天不欲留春
東君暗歸去
碧梧枝上看
瀟瀟風送雨

初至梧州

夜半江風吹竹屋
起挑寒燈憐影獨
荒雞亂啼思轉多
點鼠嘯躍眠不熟
舊曲情聲覺悲涼
故園心眼時斷續

何當牽大臂蒼鷹錦帽貂裘呼蹴踘

題潛庵

已把功名等風絮鶴氅星冠懶成趣谷口人尋虎跡來
林間屋在猿啼處好向青山白雲外叅取翠竹黃花句
道人珍重老維摩明日千峰萬峰去

仙巖金仙閣

寒煙鎖斷梵王家一篆博山飛冷蛇滿天秋雨落瓊花
清溪漲綠浸平沙老松壓石巖爭聳青蘿拽樹牽雲遮

竹根倒出烏翅斜夜半寒風攪宿鴉木魚喚粥蝴蝶醒
巖頭殘月沈丹井

閒述

一卷無人識千鐘對客談桃花開欲謝猶自戀寒潭

題何姑仙隱處

閨苑無蹤跡唐朝有姓名不知紅玉洞千古夜猿聲

呈嬾翁三首

酒惡頻將花嗅睡酣便把茶澆秋到梧桐枝上夜來風

雨瀟瀟

蓮葉嫌風狼藉稻苗得雨精神翻憶武夷九曲去秋艤

棹溪濱

秋雨織愁成段暮雲過眼生花棲鳳亭中寂寞武夷舊
有僊家

曲肱詩

白雲隨我見天台又趣金華路上迴棲鳳亭中留不去
武夷山下野猿哀

九曲雜詠

流水光中飛落葉白雲影裏噪幽禽人間幾度曾孫老
只有青山無古今

得得來尋仙子家昇真洞口正蜂衙一溪春水漾寒碧
流出紅桃幾片花

插花臨水一奇峰玉骨瓊肌處女容煙映霞衣春帶雨
雲鬟霧鬢曉梳風

織就霓裳御冷風玉梭隨手化成龍天孫歸去星河畔

滿洞白雲機杼空

武夷

仙掌峰前仙子家
客來將水煮新茶
主人搖指青煙裏
瀑布懸崖剪雪花

曉

風吹萬木醒
栖鵲月落西山啼
斷猿雲捲翠微深
處寺一聲鐘落碧巖前

坐

千山猿呌月如畫萬籟風號天正秋霧濕蒼苔湮漠漠
白雲飛夢過瀛洲

題棘隱壁

苔空綠錢死松老清陰瘦結廬卧白雲栢子燒春晝

木郎祈雨咒

乾晶瑤輝玉池東盟威聖者命青童擲火萬里坎震宮
雨騎迅發來太濛木郎太乙三山雄霹靂巽上皓靈翁
猛馬四張剡火衝流精鬱光奔祝融巨神泰華登雲中

墨旛竈蠹揚虛空掩曦蒸雨屯雲濃閔伯撼動崑崙峰
幽靈翻海玄溟洞馮夷鼓舞長呼風蓬萊弱水興都功
龍鷹捷疾先禦兇朱髮巨翅雙目彤雷電吐毒驅五龍
四溟靉靄羅陰容一聲四海改昏蒙雨陣所至川流洪
金光流精斬旱虹洞陽幽靈召靈寢玉雷浩師變崆峒
虛皇泰華掃妖燼羣梁玄黃號前鋒祠泉恣蜃威天公
歛火律令翻穹窿鞭擊妖魅驅蛇蟲勾婁吉利炎赫蹤
登僧澤頤悉聽從織女四歌心公忠輔我救旱助助隆

赤雞紫鵝飛無窮
攝虐縛崇送北鄧

石倉歷代詩選卷二百二十四

欽定四庫全書

石倉歷代詩選卷二百二十五

明 曹學佺 編

宋詩一百二

黃希旦

性慵

性慵人事拙思向遠山居欲得是非少先宜來往疎善
鄰惟水竹良友祗琴書冷淡生涯外逍遙一室虛

頤真亭

剪去舊蒿萊開亭養聖胎
閉闔虛室白隱几寸心灰
月上池浮露風生竹掃苔
悠悠奔競者何處問丹臺

春日書懷和韻

二月又將半閒居興若何
芳菲殊未賞泥濘阻相過
華砌饒苔蘚柴門長薜蘿
韶顏須自惜隨分樂天和

采藥

采藥山中去扳躋不覺賒
深源無俗迹滿地是靈芽
巖

迴陰留雪溪澄淨見沙可憐名利客應笑此生涯

和人秋感

烈士感秋興高吟擊太阿功名辜壯志歲月歎流波永
巷蛩初響荒堦葉漸多靈槎如可約從此汎銀河

水心亭

爲愛方池淨危亭此構新寒光搖玉鑑晴色戲金鱗月
上驪宮曉蓮開水府春主人能息慮四座絕風塵

詠竹

生涯何所有滿砌植琳琅瘦影碎秋月健梢橫曉霜且
從喧鳥雀終待集鸞凰吟遶都忘却誰知此興長

二月春將半三首

二月春將半幽居掩竹齋自慙疎懶甚苔蘚滿空階
二月春將半農畊細雨中花前輕薄子醉倒笑春風
二月春將半霖霖雨尚寒松黃收拾晚狼籍滿金壇

贈逸人

白雲處士入雲中三尺焦琴百尺松長嘯一聲寒澗遠

千厓萬壑起清風

寄贈寶幢修山主

瑤幢真勝槩晦迹一禪翁語默呈心印縱橫振祖風
晝閒人事外夜靜月華中若問春來意松青百卉紅

秋日登樓

高閣倚斜陽登臨覺倍涼殘蟬空自咽歸燕爲誰忙
蔽日雲頭猛沿山雨脚長竹邛溪上影髣髴似瀟湘

懷中孚

睽違雖未久南走夢魂多客路隨飄梗年光歎擲梭葉凋隋苑樹風走洞庭波舊約龍山會歸來赴若何

晚眺

晚涼思遠眺策杖出松林車馬自來往路岐橫古今商飈未落葉永巷已鳴砧自笑眠雲客因時感激深

寄友人

性僻少知己惟君日往還聽琴憐寂靜賒酒笑艱難俗眼從他白吾儕且任閒生涯人莫問到處有雲山

簡襲慶齋主人

雨過浮山好無如襲慶齋主人操大雅樓閣俯蒼厓檻
碧搖新柳庭黃發嫩槐登臨詩酒興此際與誰偕

遠遊

自在遠遊去閒門誰見過援琴空轉軫對酒不成歌秋
景生新桂涼風撼敗荷天涯誰是侶歲暮莫蹉跎

秋半

晚吹生叢竹淒涼又半秋年華驚條忽人事覺淹留林

噪殘蟬急山光暮雨收登臨將眺望煙霧閉層樓

古意

大道長閒閒人心自艸艸天地固無私賢愚同一老誰
信丹丘人顏色常美好我亦斯人徒相從須及早君看
東流波日夜長浩浩

寄益老侍官南康

匡山勝槩昔賢欽今日多君復訪尋李白書堂螢自照
樂天禪室月空臨澗松巖檜當年色霧鶴霜猿此際音

莫對他山忘故里
武夷秋晚洞雲深

竹洞

竹洞新開碧玉林
徑幽疑入五華深
夜篩明月一天靜
晝擁青雲四座陰
剪杖佇看雷雨化
迎風時聽鳳凰吟
煙霞不用重闌閉
塵俗誰能此訪尋

燈夕和韻

年年此夕闌間閣
豈料閒居興自恬
競逐艷陽遊冶去
寧知華髮等閑添
火連夜市曾無禁
燈混星文不可占

聞道玉樓歡宴處夜闌猶未捲珠簾

讀禪月集

唐末高僧號貫休篇章激切近詩流
煙華雪月何妨咏水竹雲林不礙遊
蜀國至今名籍甚蘭溪當日蹟淹留
此心彈指雖云妙爭奈闍黎未點頭

閒居

艸堂嘯傲動經年已把生涯付自然
謾費工夫披古籍懶通名字謁時賢
爐中間養陰陽火身外誰求子母錢

寄語王褒如著論不同呼吸學神仙

寄李尊師

底事悠悠信莫聞還疑深入武陵源幾年江上秋風夜
故國閩中暮雨村塵世功名寧自笑蓬壺旨趣有誰論
路岐無盡人空老白髮慈親奈倚門

謝人惠星冠

學道多年尚屈蟠豈勝仙伯贈嵒冠曉簪乍覺星攢頂
夜戴偏宜月滿壇對鑑寧煩朋友正避時羞爲利名彈

豫思他日雲林下輕罩紗巾鶴髮寒

幔亭

曾孫嘗會幔亭中脯擘麒麟酒滿鐘宴罷不知消息處
至今鄉老望孤峰

讀方干詩

數篇騷雅名雖遠三拜逢迎禮過差補得唇來身已老
灌園何苦更咨嗟

和賈鴻舉移竹

琳房珠館何虛寂
寶砌無塵苔蘚碧
仙翁倚檻靜吟哦
却憶簷簷拂巖石
勁節虛心守歲寒
未嘗暫變風霜色
移來迢遞不辭勞
深根訝向瑤臺植
漸承春意葉青青
時惹天香煙冪冪
月籠翠影尚蕭疎
露被繁枝纔滴瀝
迎風閒夜擬龍吟
結實他年期鳳食
非才終約老煙霞
此際謬當親採擇
寄言紅紫莫相猜
彼此無情蒙化力
逢時剪拂任他人
沈去葛陂都咫尺


感時行

勸君莫種木槿花朝榮暮落堪咨嗟
勸君種取亭亭竹霜繁風勁依然綠
誰不見陳餘張耳輩當面論交旋踵
背又不見管鮑光武與嚴光貧賤富
貴難相忘英聲獨與天地長令人萬
古遙相望不可得見空徬徨

觀申公山水

申公山水老更狂
眈眈巨耳雙瞳方
生涯秃筆數千管
欲與造化爭毫芒
長煙三素挂四壁
經營指點何安詳
凝神淨慮偶得意
一灑混沌開玄黃
須臾三才及萬類

迺邈筆下分低昂水寒石瘦老木恠兼葭岸古天蒼蒼
伊余本是山間叟對此直欲乘風翔咫尺杳然數萬里
直疑跳入壺中藏



石倉歷代詩選卷二百二十五

欽定四庫全書

集部

石倉歷代詩選卷二百二十六

詳校官庶吉士臣范逢恩

侍讀臣孫球覆勘

總校官進士臣朱

鈐

校對官中書臣葉

蘭

謄錄監生臣宗

煒

欽定四庫全書

石倉歷代詩選卷一百二十六

明 曹學佺 編

宋詩一百三

釋德洪

寄彭景醇奉議

我庵湘山麓君家湘江尾
共看湘山雲同飲湘江水
君有負郭田飽食驕穉世
小兒操井臼大兒了租稅
我獨

生事拙饘粥每不繼君如李大夫時時容乞米永懷湖
山堂風物自閒美楞嚴初讀罷篆冷空窗几微風拾殘
紅幽鳥妨春睡蒼苔滿門巷榆柳陰覆砌杖策亦窺園
悠然望層翠

雪霽謁景醇時方禊堤捍水脩湖山堂復和前

韻

禊堤蓋南堂雪霰響新瓦我踏雪泥至自攜雙不借愛
公有俊氣句法洗凡馬清婉繼彭澤寒陋笑東野願為

西崦隣投名入詩社餘年吾事濟過從有公者何時閒
折竹燈火共清夜

陪張廓然教授遊山分題得山字

先生如梁鴻德耀亦愛山湘西十日留笑語煙雲間弄
泉石梅塢喚舟青蘋灣藉草飲松下松風當吹彈二妙
生清妍山花挿雲鬟粲然起為壽舞袖相翩翻先生墮
憤醉頗覺天地寬醉語忽成詩為題蒼壁顏城郭遙相
望但見千峰寒

又得先字

青山隨處有見之輒欣然獨于湘上山欲買歸休田此
邦多君子故欲吾終焉先生人品高白鷗春水前弟子
殊秀發玉樹相明鮮頗怪翰墨場亦著白髮禪分題得
難韻下筆風雷旋詩成愕衆口不復較後先間中有此
樂安用食萬錢紫芝愛陸渾遂為好事傳悠然見眉宇
寧復羨遺編

寄題雙泉

閻公立朝時凜然古遺直孤忠捍世波砥柱屹挺特一
旦成千古埋玉秀山側至今山中泉實以配公德欲知
其源深下漲千頃澤沙渠走清快丹井湛紺碧譬如澠
與淄相去無尋尺日光每下徹山影必倒植倚欄應欣
然遊鱗見尾脊知誰念純孝滿掬種白石粲然生玉英
冥感吁莫測泉旁有精舍聞多登覽適何時同二老追
逐扶瘦策詩成坐假寐夢歷秋山赤想見環佩清繞除
餘響滴

次韻夏夜

隱几羣動寂池塘浮夕光瓦溝急雨過熏風滿南堂飛
螢忽點衣小立聞荷香東南喜見月微雲復遮藏長哦
穎皋詩清語沁肺腸勁氣終不屈鏤錙淬光芒高懷寰
宇間蠢蠢犇炎涼斯人古遺直天質自溫良茲夜發遐
想易親復難忘歸田無別意難以杓入方

次韻過醴陵驛

解鞍成小寢部曲營夜炊此生一寄耳夢勾相拘縻風

食雜舍者水宿依江湄何時步八埒壓犀簾幕垂三相
在圖畫開屏供卧披公宜宿玉堂明甚無可疑今復聊
爾耳間作虎頭癡

贈別若虛

殘暑霽嚴威新涼釀歸思夢驚聞松聲兩鬢到萬事中
情怯離別此別仍對子追惟初識面寧復計有此明朝
舟洞庭驚浪銀山起醉眼失湘楚妙語凌淮泗我如浮
水葉遇坎當自止行將看荆山歸老鹿門寺

和游福巖

雲開見樓閣峰頂知有寺衆峰讓高寒蓋是出其類曹
溪正脈深不斷渺如帶流而至衡霍百川蓄滙澮迺知
般若臺自昔分燈地清游亦不惡俯仰憶前事實構出
灰燼人逝時亦異永懷韓潮州夜與千峰對仙去三百
年音容恍如在妙語落人間斷碑卧榛櫟

和杜司錄嶽麓祈雪分韻得嶽字

歲晚湘水濱黃塵似河朔江流涸欲盡鉗罟汲餘濁忽

聞雙旌出千騎爍山嶽雪雲卷山去天宇獻遼邈嬌鴉
集風枝凍鶴時俛啄山雖非故人識面亦已數豐年屬
勝遊與我同三樂

次韻經蔡道夫書堂

書堂山崦西微路經桑柘婉婉綠陰中偃僂牽羸馬須
臾將平川時過幽溪瀉源深人家稀落日耕釣罷過牆
傍修竹深處開茅舍池塘遠軒窗秀露風清夜杯盤燈
火裏笑語茅簷下夜闌乞新詩自愧非作者張燈掃西

壁把筆強驅駕萬景每騷縱此夕偶相借遂令諸子歡
一一如圖畫

題獄麓深固軒

湘西峰頂寺樓閣藏煙翠危臺占冢顛小軒寄幽致游
人常不到石壁照溪邃于世復何求此生眠食耳脩然
亦何有蒲團空曲几凭高俯城郭車馬環磨螳城郭望
諸峰時見孤雲起

中秋夕以月色靜中見泉聲幽處聞為韻分韻

得見字

夜清成水宿月出波灩灩那知是中秋老眼欲淒眩此
生天地間飄泊如蓬轉竭來泊相濱此月凡七見冰輪
上天衢萬里不知遠夜深度明河輪側明河淺西河欲
吹笛餘音落哀怨

次韻周達道運句

朱門連大藩知是故人宅登門一笑歡忘其身是客叢
林斷岸西聚落一水隔欲知往來數雞犬亦相識撥書

卧清曉井汲聞餘滴職嚴賓謁少境靜意自適

次韻朝陰

輓轡曉汲罷幽響聞餘滴不知雨毛空但覺炊煙濕閒
居少過從屋角寒藤入夫子獨念我問訊常絡繹時來
歎柴局飢飽共休戚此詩麗如春妍暖破岑寂如追薊
子訓可望不可及

送彥周

彥周美少年風味映前古令人每見之不敢發鄙語推

墜吾法中偃蹇揖佛祖死生人所怖玩之于掌股此生
幾離別此別覺酸楚夜寒衆峰高獨看霜月吐

次韻游方廣

萬峰纏煙霏一線盤空路丹楹出翔舞半在生雲處海
人猿臂上哀湍不堪泝夫子英特人自是幹國具醉耳
厭絲竹來此良有故臨高賦新詩妙語發竒趣便欲抱
琴書亦作東家住山靈應拊掌笑公方窘步富貴牢縛
公雲泉寧可付置卷發遐想湘月微雲度

贈珠維那

湘雲遮世路閒客此閒行
彌日不忍去眷此山水清
暖窗欲春色茗椀雪花輕
道人舊不識一見意已傾
人生無根蒂聚散如流萍
聊炷返魂梅將以熏道情
此詩亦偶爾夫用四座驚

謁狄梁公廟

九江浪粘天氣勢必東
下萬山勒回之到此竟傾瀉
如公廷諍時一快那顧藉
君看洗日光正色甚閒暇
使唐

不敢周誰復如公者古祠蒼煙根碧草上屋瓦我來春
雨餘瞻歎香火罷一讀范公碑頓塵看犇馬斯文如貫
珠字字光照夜整帆更遲留風正不忍掛

同彭淵才謁陶淵明祠讀崔鑒碑

晉室東渡後主弱祇如寄桓溫弄兵權劉裕竊神器先
生于此時潔身良有以袖手歸去來詩眼飽山翠追還
聖之清太虛絕塵滓長恨千載心斷絃掩流水

陳氏貫時軒

春風著萬物粉飾相明鮮雪霜摧壓之不情如世權問
誰不可犯揖此蒼玉椽斫頭未易屈槍地猶傲然相逢
凋零中秀色披晴煙陳侯我輩人逸氣傾羣賢開軒冷
相向酬酢忘歲年我來作風聽夜雨雒山泉攜被願假
宿與子對牀眠

懷慧廓然

蕭蕭暑雨過空山成夜晴月出東南峰娟娟風露清飛
螢自開合寒蟬亦悲鳴興來忽獨往聽此落磬聲永懷

西湖上絕景玉壺明松際脩然姿振策自經行即欲呼
就語忽隔千里程何時徑尋子夜航過臨平

同超然無塵飯栢林寺分題得栢字

沙村宿雨餘炊煙淡寒色山墟蠶市休野飯漁舟隔忽
逢柳際門知有道人宅叩扉山答響童子出迎客空庭
竟何有凍死千歲栢鐘鳴食時至老僧揖就席香杭定
宿春露葵應曉摘差飢一飯美何啻萬錢直風軒納山
翠引手捫石壁愛此玉崔嵬歲久自崩圯下有洄渦泉

甘涼冰齒頰勿輕一脈微去漲萬頃澤吾行無疾徐住
佳去亦得欲收有聲畫絕景為摹刻興來勿復緩轉顧
成陳迹

十二月十六日發雙林登塔頭曉至寶峰寺見
重重繪出庵主讀善財徧參五十三頌作此
無簡堂頭

十年懷石門今日石門去雙林動曦光跋河開宿霧力
微藉古藤泥軟脫芒屨風泉白雪壑夜雨青松路我生

百事廢齒髮行衰暮但餘愛山心不逐年華故此山甲
天下自昔家吾祖峰如青蓮花千葉曉方吐煙雲浮香
色清涼洗肝腑異哉萬木間白塔巋然古此老無恙時
超放誰與伍萬象供笑談大千為戲具我曾從之游絕
塵追逸步誰云今已亡塔開全體露水懷憑妙觀此意
竟淒楚

仁老以墨梅遠景見寄作此謝之

荒寒掃橫斜稀疎開未徧煙昏雨毛空標格終微見吳

姬風髻亂睡色餘妬面誰令種性香風味極不淺道人
三昧力勾出隨意現塞管玉纖寒無勞寫哀怨

上巳日有懷昔從雲庵老人此日山行

今年上巳日久客望江南雙林接脩水石路入煙嵐千
峰出雲雨空谷吞寒潭蒼杉鬱童童秀色凌雲庵不見
庵中人青燈耿塵龕空餘行樂處攀翻聞笑談風光與
節物觸愁味參參臨高望煙靄衰涕落春衫

送正上人歸黃龍

道人泉南來音姿頗純美觀其略笑語亦自飽風味相看坐終日孤月墮止水但見篆畦間青煙行未已朝來忽去我秋風動衣袂試問安所之笑指千峰裏秋晚當相尋結伴入層翠

余在龍安木蛇庵除夕微雪及辰未消作詩紀之

元朝喜見雪一室譁少長新年方下車故歲已長往知誰徑尋我東牆屐齒響正當穩靠蒲移几就紙帳一片

忽飛來墮我詩卷上為置石鼎烹茗飲聊同賞

次韻李商老匡山道中望天池

幽人修水上春漲冒陂田時時想見之笑頰微渦旋往
來柴桑間妙語生雲煙廬山自高寒青碧開晴天倚藤
望絕頂風味如斜川我思從之游子亦當勉旃詩成聊
假寐歸夢歷層巔

居上人自雲居來訪白蓮社話明日告歸作此
送之

浮雲山盡際花木迎春暉佳人殊方來見之消渴飢藉
草坐松影粉香時落衣氣貌秀可掬出語超幽微巖壁
鐘聲寂山陰花發稀去袂挽莫留又作甌峰歸

送通上人游廬山

少年四方志一杖餘氎巾朝來過微雨扁舟買南津廬
山冠天下况復當青春遙知泊星渚雲開蒼翠新相看
發一笑瀑布垂天紳虛漢清月上山空無四隣應懷千
載姿坐榻空埋塵興來得好句錄寄北山人

同慶長游草堂

萬株蒼煙間杳然出微徑相逢知有得一笑洗孤憤蕭
蕭半窗雨終日滿風聽綠雲到巉絕小立銳清興約公
我輩人發此一區勝春工自無私風力亦強敏柳垂拂
掠黃溪作揩磨淨籬間殿寒梅吳姬發微哂已欣鳥聲
樂更愛游絲迥余郎妙天下氣與山嶽峻春光纏肺腸
霽月恍風韻詩如畫好馬落筆得神駿日斜興未闌路
窮春不盡更為明日游踏徧鐘山頂旋汲一人泉峰頭

煮春茗

寄巽中

熏風度南枝餘芳委紅綠微雲生晚陰梅雨淨林麓穿
花鶯語遲翻泥燕飛速遐想幽人居夢過剡溪曲清聲
久絕耳斯懷抱煩燠仰道思彌高哦詩出凡俗脫屣滿
戶外輪蹄日相逐吾徒不得人大法世陵叔智办剪蒿
蓬利鋒揮樸楸念往追前席初筮不我卜別來空相思
徙倚蒼山木

送濟上人歸漳南

密林影羣陰露葉光翻夕幽人獨經行滿院許秋色幾年涉嶺海頗亦歷佳席通來寄江寺癡坐室生白吾家在漳南萬頃蒼玉壁何當附舶歸重拂林下石此生一夢耳夢覺試尋繹倚筇作長嘯萬事付鳥跡若有閒中吟無惜寄飛翼

夏日雨晴過宗上人房

仲夏林木深古寺雨初足殿閣風颭鳴閒庭草空綠小

軒試凭几解擇愛新竹點筆記題詩粉色不受觸道人
有佳處面數良以熟脩然亦無營來往相追逐此時偶
相值一笑天宇局何當烹壑源澆此腸胃俗

泊舟星江聞伯固與僧自五老亭步入開先作
此寄之

煙霏含空青向晚望逾好欲行雙瀑邊俊鶻屢側腦偶
攜白髮禪步盡青松道孤鴻聊送目瘦策自扶老甚欲
東澗陰縛屋安井竈我亦個中人歸計嗟不早永懷巖

上僧松鬣和雲掃

冬日顯寧偶書

山舟不肯留白髮日夜益曉窺青銅光乃覺朱顏失故
人半凋零行吟百憂集舊山天盡頭歲晏衰眼力高枕
此山泉此興復何日百年暗相驚奔忙如瞬息喬松亦
已塵仙術無煩乞

又次前韻

禮法日荒蕪坦率日增益惟餘枯藤枝起坐不相失山

枕孤雲歸林寒倦鳥集愛此亦題詩鈍澁見才力乃知
衰老來全殊少年日勞生知幾何萬事歸歎息鉅斧好
濯磨當就阿誰乞

奉陪王少監朝請游南澗宿山寺步月

單衣喜和風詩眼愛空翠野亭亦脩然散坐聊倦倚坐
久忽聞樵見視一笑喜那知深林外曲折見流水幽光
弄紺碧春色潑秀氣去為千頃澤隄柳相嫵媚月光方
下徹浮空見潏尾投礫戲驚之撲撫沙禽起歸途望林

壑煙靄隔山寺便如斜川游歲月亦相似

觀山茶過回龍寺示邦基

北窗賞新晴睡美正清熟竹鷄斷幽夢朦朧不能續卧
聞故人家山茶已出屋欣然一命駕妍暖快僮僕千朵
鶴頂紅染此叢間綠坐客例能詩秀句抵金玉攜過回
龍寺掃壁為君錄逸筆作波險歌斜不可讀坐驚殷床
鐘暮色眩雙目入關更清興市井亂燈燭人生分萬途
稱心良易足時平且行樂餘賓非所欲

同敦素沈宗師登鐘山酌一人泉

鐘山對吾戶春曉開煙鬟白雲峰頂泉紺碧生微瀾經
年未一酌對客愧在顏兩翁亦超放瘦策容躋攀大千
寄一瞬境靜情亦閒是時天慘愴佳處多遺刪立談共
嘲謔豪氣破天慳臨川冰玉清風流繼東山孤坐巉絕
處掉頭不肯還天風吹笑語響落千巖間歸來數清境
但覺毛骨寒從君乞秀句端為刻欄斑

宿宣妙寺

卷二十六
衝虎困頓歸投枕眠爛熳夜晴霜月苦睡美不知旦日
高披曉綠萬事付衰懶百年炊黍久強半得憂患起臨
清淺流白髮不可揀此生終一壑形勝已入眼明年定
來歸茅屋並崖瞰掩門無營為一味工寢飯

懷忠子

昏花委篝燈夜雨集梧井空房啮飢鼠壞壁咽寒蚓有
生獨多艱念極淚殷枕親朋勢宜絕醜惡諱聞聽棄遺
等苦李零落如斷梗忠也新數面義已到刎頸願留廣

推擠守護輕軀命逐臭寧有理嗜痂亦天性人情骨肉
離道義燕秦并相逢百憂中如熱啜甘冷氣清秋潑山
韻勝日夕鏡何時一丘壑攜子脫塵境風林作清獻追
步千峰頂

石門中秋同超然鑒忠清三子翫月

三年竄南荒兩過中秋夕月不棄羈囚高天照罅隙凜
如寢雪霜但覺炎瘴失夢清不敢歸鯨浪濺天白中原
一轉首心折萬峰劇遙知亦念我看至玉輪側有生窮

至此甘作死生隔筠溪遠茅廬波影登几席危磴通石
門攀眺屢傾陟華紛落無餘但見霜露實地坐閒無人
厭聞蟲唧唧

十六夜示超然

山深久不晴銷盡三伏暑夜涼聞風泉疑作空階雨但
覺紙窗明不知山月吐階除偶獨立滿庭浩風露室閒
門未掩時有飛螢度餘生願俱子萬壑千巖處艱難百
憂中長恐此心負今宵復對榻樂事遽如許地偏心亦

遠喜劇憂自去將回廬山陰一水斷世路

初到鹿門上莊見燈禪師遂同宿愛其體物欲
託迹以避世戲作此

上莊俯漢江古木雜桑柘衙陰廣陌麥浪漲平野連
雲對困廩用谷量牛馬我來二月破解鞍綠陰下縱望
煙霏中領略見楯瓦者年骨柴崖迎客意傾寫干戈爭
奪餘身在相驚詫山空啼杜鵑龕燈自清夜

三月二十八日棗栢大士生辰

思慮不及處但曰刹那際不謂一之中而又有三世于此刹那頃尚不容擬議安得容死生一切諸怖畏苦樂欣厭情紛然心境異是名顛倒想不名隨順智如人游夢中所歷經千歲及其夢覺已不過夕頃耳稽首願悲憧發此不傳秘願分無盡燈仰酬四弘誓

題李愬畫像

淮陰北面師廣武其氣便可吞項羽君得李祐不肯誅已知元濟在掌股羊公德化行悍夫卧鼓不戰良驕吳

公方沈鷺諸將底早笑元濟無頭顱雪中行師等兒戲
夜取蔡州藏袖裏遠人信宿猶未知大類西平擊朱泚
同景莊游浯溪讀中興碑

上皇御天功最盛生民溫飽卧安枕醉凭艷姬一笑適
薄夫議之無乃甚長安遮天邊騎塵潼關血戰深沒人
哥舒臣賊不足惜要鬻國忠如膾鱗蒼黃去國食不暇
馬嵬賜死謝天下反身罪已成湯心寧歎郎當雨淋夜
取非其子又遽忽靈武君臣無忤容詎須嗚咽讓衮服

自控歸鞍八尺龍誰磨石壁湘江上指拭雲煙濺驚浪
龍蛇飛動忠義祠顏元二公凜相向與君來游秋滿眼閒
行古寺西風晚道人興廢了不知但見游人來讀碑

神駒行

沙丘北黃馬已死俗馬千年不能嗣忽生此馬世上行
神駿直是沙丘子紫燄爭光夾鏡眸轉顧略前批竹耳
雪蹄卓立尾蕭梢天骨權奇生已似綠絲絡頭沫流甯
繡帕搭鞍初結尾決驟意態欲騰驤奔逸長鳴抹千里

贈許邦基

邦基今年方十九美如濯濯春月柳龍章鳳姿絕世無
金馬玉堂如故有酒闌愛捉玉麈尾玉色正同批詰手
高燒銀燭擁新粧看君落筆龍蛇走欲驅清景入秀句
萬象奔趨不敢後人疑錦繡纏肺腸不然筆端應有口
謫仙風流今復見况亦彷彿外塵垢但恐功名纏縛人
未放青山掛窗牖

汪履道家觀所蓄煙雨蘆雁圖

西湖漠漠生煙雨，浦口團沙鳬雁聚。今日高堂素壁間，忽見西湖景西浦。翩翩兩雁方欲下，數隻飄然掠波去。獨餘一隻方穩眠，有夢不成亦驚顧。蕭梢碧蘆秋葉赤，青沙白石紛無數。我本江湖不繫舟，爾輩况亦江湖侶。令人便欲尋漫郎，呼船深入龍山塢。

高安會諒師出諸公所惠詩求余為賦

黃塵踏徧江南岸，矯首無言對河漢。故山有屋埋深雲，一夜歸心掣不斷。綠錦江頭識諒禪，傾坐高談象帝先。

疑君即是僧太白不然無乃真彌天仙風襲人欲輕舉
芙蓉道氣出眉宇擁坐衣裳墜不收山水懷雲輕百補
我今老倦亦慵參去死正如三眠蠶相看一笑有佳約
他日同歸五老庵

謝安道花壇

三月江南春不淺謝家池上開花苑層壇迸破碧瑠璃
嫩蘂簇成紅婉孌一枝兩枝和霧白素娥月下逢姑射
十朵五朵照水紅仙姝並立瑤池東人生遇景須行樂

莫使餘香散簾幕白雪難逃鬢上斑金尊且對花前酌
時人莫以花為浼大都自是人情改若使人情長似花
相看顏色年年在

蒲元亨畫四時扇圖

畫工妙物無不可誰能筆端自忘我醉蒲睡著呼不聞
但見解衣盤礴嬴起來漱墨滋破研霜綃咫尺開紈扇
點綴四時無不有但覺眼前紅綠眩雲破連峰青碧開
林梢時復見樓臺斷橋落日空流水為問秦人安在哉

春山杳靄知何處
夏木森森蔽雲雨
秋陰未破雪滿山
笑指千峰欲歸去

夏日西園

晚庭一霎過暑雨
高林相應山蟬鳴
南窗夢斷意索寞
牀頭書卷空縱橫
蔬畦日涉已成趣
起來扶杖園中行
葵英豆莢小堪摘
矮榆高柳陰初成
野禽啄果時落地
池塘蓋水新荷平
歸來西屋斜陽在
原舍尚聞春簸聲
自豫章至南山月下望廬山

扁舟秋晚離南浦片席搖風望星渚揚瀾大浪晴拍天
南山窈窕開蓮宇倒檣散策一登臨便擬掩關深處住
吾生飽食隨東南去亦無求住無取江山得意且題詩
從游況復皆真侶青燈灼灼夜窗深對牀卧聽風甌語
隔岸廬山金碧開月明尚記曾游處

夏日陪楊邦基彭思禹訪德莊烹茶分韻得嘉
字

炎炎三伏過中伏秋光先到幽人家閉門積雨蘚封徑

寒塘白藕晴開花
吾儕酷愛真樂妙
笑談相對興無涯
山童解烹鱉眼湯
先生自試鷹爪芽
清香玉乳沃詩脾
杼紙落筆驚龍蛇
源長浩與春漲激
力健清將秋烝嘉
須臾杳幅亂書几
環觀朗誦交驚誇
一聲漁笛意不盡
夕陽歸去還西斜

次韻余慶長春夢

阿環夢回如墜雲
研中玉纖如醉文
香囊翠被不復見
華清草木猶醺醺
仙郎春光洗懷抱
柔情不斷如芳草

軟風細漲玉橫斜一尾追風北山道詞鋒落紙磨秋霜
千首今餘萬丈光從來支遁識神駿歲月不知君意長

次韻君武中秋月下

秋光一半去無迹萬里陰晴占此夕書生醉語哦月詩
想見看朱眩成碧白公初攜佳句歸便覺草露寒霑衣
夜晴蘭室思千古領略太白懷玄暉君家客皆天下士
放意高談飲文字江左風流掃地空今日追游可無愧
余方登列岫愛西山思欲一游時皋上人來覓

詩作此

西山層翠長倚天我來正及社燕前城中高閣時縱倚
妙語已復凌芳鮮方將結伴未有侶而子乃敢犯衆先
會當披雲亂峰頂却下濯足寒澗邊遙知笑語山答響
詩句凌亂何須編就巖折桂亦細事海棠爛熳燒晴川
歸來仰屋念清境夜未央兮猶不眠

贈王敦素兼簡正平

空山無人舟壑移坐看香燒行篆畦兄弟華軒肯過我

墮甌敝帚生光輝著屐登山亦不惡攜被假宿良幽期
燈前綠髮映玉頰風流未數崔宗之夜談詞辯出神駿
絕塵赤免真權奇我欲置君帥河朔軍前千騎紅粧隨
橫槊吟詩氣慨慷玉帶錦袍英特姿又欲置君玉堂卧
霧窗棐几春晝遲醉中草制敏風雨諸公堵立相嗟咨
微吟擁鼻笑不語恐未免爾無多辭為君張燈掃東壁
他日重來讀此詩

福巖寺夢訪廓然于龍山路中見之

山高夜氣摧煩暑竹風為作南軒雨夢隨柔櫓到西興
艤舟步入龍山塢蕭蕭松下逢睿郎問信遠來亦良苦
覺來但記談笑歡不省歡時竟何語卧看篝燈一點明
嶺海茫茫隔吳楚

乾上人會余長沙

兀坐思歸不舉頭窗風為我翻書葉衆中聞語認鄉里
便覺石門寒疊疊雲庵已作白塔新當眼風枝心欲折
道人叢林十年舊古寺青燈夜相接失聲方欲問江南

忽憶去年淮上別地爐火冷霜月苦一室誼譁俄煖熱
湘山破曉立俤停秀抹鉛華餘積雪千巖佳處可同游
明日波晴當理楫

復用前韻送不羣歸黃檗見因禪師

幽尋忽覺暗香吐竹西知有梅花塢一枝試摘與君看
念君明日當離楚戛然飛去若驚鴻棄擲自嗟如卧鼓
遙知旅枕生清夢夢到江南春好處蒼杉拂雲煙翠深
為弔大雄山下虎便欲閒提折脚鐺柏子庵邊結茅住

行看談笑起雲門海上橫行如廼祖

驟雨

雲槌雨骨天為低行雲趨走不敢遲
桐英滿地誰拾去花態正顰魂欲飛
紫金蛇光誰掣斷墮空萬點跳珠亂
須臾井滑紺無泥瑠璃骨軟爭道馳
亂紅殘萼驚千片可憐憔悴吳姬面
林光草色自連天殘香依約知誰怨

臨川康樂亭碾茶觀女優琵琶坐客索詩

小槽橫捧梳粧薄綠羅綰帶仍斜搭
十指纖纖葱乍剥

紫燕飛翻初弄撥梨園曲調皆品匠斂容却復停時霎
日烘花底光似潑嬌鶯得暖歌唇滑圓吭相應啼恰恰
須臾急變花十八玉盤蔌蔌珠璣撒坐客漸欲身離榻
裂帛一聲催合殺玉容嬌困撥仍插雪梅幾枝初破臘

福唐秀上人相見圓通

廬山萬木春已透滿目春光迎馬首北山攬飯借榻眠
一任春山穿戶牖道人聞是福唐來石門曾結游山友
相逢未說別時情且欣春色濃如酒何當瘦藤上孤絕

深谷忽驚如錦繡人生超放當趁健東風已暗藏鴉柳

浙竹

龍孫初長浙江曲疎影蕭蕭濯寒玉平生知愛足風流
只有山陰王子猷而今流落蒼崖頂暗換年光鄉路永
冰歎雪壓未應衰鸞鳳不棲空故枝堅幹猶堪製長笛
最合宮商勝金石為君吹動鏡湖秋驚起雙龍翼小舟
郭祐之太尉試新龍團索詩

政和官焙雨前貢蒼壁密雲盤小鳳京華誰致建溪春

睿恩分賜君恩重綠楊院落春晝永碧砌飛花深一寸
門下賓朋還畢集碾聲驚破南窗夢高情愛客手自試
春霧脚紫雪花湧我有僧中富貴緣此會風流真法供

重陽後同鄒天錫登滕王閣

閒中過却重陽節江城風雨吹黃葉與君來遊亦偶爾
聚立西偏讀豐碣凭欄眼界得天多雨脚明邊飛鳥滅
西山向人亦傾倒犯雲爭來獻層疊未歸負負無可言
相視心知慚在頰會當却立雲生處縱望晴江生雉堞

送稀上人還石門

海昏石門在深谷排闥千峰如觸鹿岷然獨秀一峰高
自與千山作眉目曾學關西一味禪衆中雜還多豪賢
如今此老成新塔但有樓閣如當年道人今作石門客
鬚眉尚帶芳鮮色冷齋說我舊游處夢魂夜渡修江碧
朝來秋聲發舟樹羨君先我山中去

寄題彭思宇水明樓

議郎詩眼發天藏吐嗟辦樓臨汝水遙殘夜笙歌散月

出東南人獨倚微波不興天著底忽驚白晝在軒窗試
數游魚見鱗尾平生骀儻笑伊優官冷對人言少味但
餘清境得厭飫天應用此相償耳

次韻思禹思晦見寄

多生垢習消磨盡一念定光空五蘊尚能弄筆戲題詩
如鐘殷牀有餘韻南臺煙靄隔重灘城郭遙應認刹竿
湘西六月失三伏一枕窗風午簟寒年來懶復嫌山淺
更欲移庵藏僻遠又思喧寂不相妨卧念當年三語阮

鏡裏朱顏豈長對歲月去人寧少待是身已作夢勾觀
肯復經營此身外

春去歌

杏子生仁桃葉長西園日踰女牆牆陰嬌語誰家娘
涼涼作隊來採桑玉纖拾礫抵翠羽鶯燕笑語殊不忙
吳蠶睡起未成繭肺腸已作金絲光歸來遠山堆暮碧
無端野李嬌春色辛夷花零愁更多熏骨真香無處覓

李長出示子蒼詩次其韻蓋子蒼見衡嶽圖而

作也

曉煙勻出千萬峰個中我曾如懶融天公亦妬飽清境
戲推墮我塵網中人生萬事無不有道士寧知為老楓
去年雪夜宿絕頂笑聲響落千巖風今年千巖在掌握
煙雨又復分西東磨錢作鏡照千里必也高人非畫工
季長胸中自丘壑吐辭便覺春無功韓侯玩世難共語
精神滿腹仍疎通酒闌耳熱眩紅碧醉語撼子崔嵬胸
遙知墮憤笑不答但見玉頰回渦紅

送季長之上都

十年不踏黃塵路老盡歸心餘一縷因同夜語想京華
歸心百尺游絲舉前年別我楚山邊解鞍班草弄雲泉
今年送公古城北花發水流聞杜鵑眉間秀色照春晚
青雲故人紛滿眼門前車馬氣如雲知誰倒屣迎王粲
行看腕脫供十吏玉堂風景非人世萬乘叩扉宮月斜
夢驚呼燭度窗紗

復和答之

君不見功名欲致硯磨鐵桑公人間駒汗血五季干戈
爭奪中低摧幾不保臣節又不見相如賦工合騷雅九
重偶有賞音者及見但為上林令斷國反在淄川下長
笑兩事俱外物自憐不是封侯骨獨愛華亭百衲師小艇
橫蓑一竿竹久住湘江諳水脈揭蓬慣看湘西月聞道
公眠畫戟叢相尋長恨城闌隔去年卜居城北地客心
每有悲笳碎慚愧詩筒走老兵病眼那容見新制老來
情緒那忍說風瘴乘之覺疲繭此生夢勾姑置之半掩

殘經香篆滅湘中清境享已飫湘山多情慰心素年來
更欲學睦州古寺閉門工織屨

次韻汪履道

老來漸覺朋儕少夜室孤禪還自照吟詩垢習未全除
賴有汪郎恰同調嘗聞從來以類從谷風忽作虎應嘯
交道今嗟張紙薄老人嘗乖少年約與君一笑似三秋
此道長令洞開廓

送子美友

曉痕翠浪行將徧掠面柔風初剪剪梅頗欺寒底死香
柳眼窺煙皺未展相看感此故意長欲別忍看春尚淺
離情惱人深造次撩我小詩弄清婉腸斷江頭無語中
謝郎疋馬嘶風遠

慈覺見訪余適渡江歸以寄之

黃沙橫吹意儻恍江色模糊迷背向刺舟開岼風掠耳
日暮歸來說驚浪旋添檣柁火蒙密堵立咨嗟羅少長
枕櫟鏗然野炊熟井稅未輸夜春響少年信腳踏憂患

幾同蛋叟埋煙瘴歸來閒散贖辛勤老住江村無雜想
送友人

幽人獨負三尺琴自謂羲皇得意深經年不肯鼓一曲
欲造千里求知音夕陽渡口西風起黃葉紛紛墜秋水
送君胍胍上孤舟片帆忽舉風波裏此去吳中風物好
重複江湖我曾到桂子落時雙澗秋白猿啼處孤松老
却入苕溪凡幾里連天震澤無窮已紅蕖苞折流水香
紫萼絲軟鱸魚美何時興盡見歸舟古今客路多飄流

孤雲別鶴無蹤跡空聽蟬聲野渡頭

偈能禪三鄉俊宿山

湘西春色無人要萬頃鑑空飛白鳥小閣披衣眼力衰
一聲欵乃酬清曉芒鞋閒穿聚落來此岸綠陰行不了
南臺老未忘鄉井抵掌清談輒高笑烹茶煮笋未當勤
放意賦詩語奇峭此生何處不戲劇萬事隨緣真道妙
何當借子西齋宿共看湘月千峰表

寄題紫府普照寺滿上人桃花軒

武陵源深並溪入無數桃花開春色水面紅雲欲崩壞
波間爛錦光相射昔人誤行偶見之歸來醉眼眩紅碧
秦時雞犬不聞聲但覺曉窗煙霧白那知紫府亦仙源
比華萬樹燒晴原少年必翦誰教汝照花作意開幽軒
靈雲說悟被花笑南泉欺客花不言何如睡足無一事
倚欄紅雨春風顛愁來想見故山路未歸先作山中篇
與海兄

春寒真料峭久客厭江城雲重欲為雨風和尚未晴意

隨飛鳥去緒逐亂埃輕畢竟閒居好煩君念此情

燈花偶書

岑寂一間僧春宵清興增竹窗催夢雨蘭室對禪燈世事知虛幻人情剪愛憎短長都分定不恨百無能

懷友人

不見隣峰友還同楚越遙每勞孤枕夢時過小溪橋凭檻疎簾卷臨風細雨飄何當奉一笑令我此情消

早行

失枕驚先起人家半夢中聞雞憑早晏占斗辨西東
濕知行露衣單怯曉風秋陽弄光影忽吐半林紅

遊靈泉贈正悟大師

支徑入山寺雲林如見招小軒臨絕壑危閣礙層霄
瓶泣地爐煖屋晴巖雪消大師京國舊放意話州橋

白日有閒吏青原無情民為韻寄李成德

客來清對榻客去閉深闌聊為文字飲酬唱相往還
朝來公事少白日吏長閒

花光浮縣郭，麥浪漲郊原。吏散僧投謁，詩成月上軒。
何妨橫麈尾，相對兩忘言。

湘陰馬上和季長見寄小春

風埃九十里，霧雨濕駝裘。雁過回詩眼，江寒聚晚愁。
魂清方怯雪，句冷更含秋。殘岸連孤嶼，依稀似橘洲。

三月喜超然至次前韻

楊柳風蕭蕭，芙蓉晴漫漫。水閣試新涼，披衣快清旦。
幽居非養高，一榻聊醫懶。默觀四大空，吾復有何患。

覽秀亭

尚記登臨時風日初盎盎忽驚四野春登我眉睫上情
欣鳥聲樂意適游絲放我非連眉郎搜詩聊植杖

寒亭

欲問春消息蒼茫嫩日斜茅簷聚喧雀栗林棲暮鴉絮
袍裹足坐得句往往佳忽起步微月呵手拗梅花

和杜撫勾古意

歲月走舟壑不能老喬松何如取塵劫安置彈指中我

老世不要閉關師道蹤自欣方得計人笑伎之窮

其二

長松援丈蘿無事登青冥因緣偶然爾初非出經營我
欣氣數似掄材置勿聽翟公亦癡絕書門譏交情

其三

午夢清斷續雙鬢飛蚊鳴微風亦見戲故掩讀殘經相
見洞天曉霧重花冥冥秀句吐奇麗乃爾未忘情

其四

暮年一杯春愁邊
賴開拓醉鄉歸路穩
城郭見隱約萬事付
頽然破憤風墮落胸
次竟何有八窗洞空廓

遊廬山簡寂觀二首

廬山覺未老儼然舊
風姿樹石亦仙骨逢
春更華滋瓜分煙翠
層千丈垂白霓貪看
讓爭席舍者爾為誰
蒼石大如屋古木出
虬枝四注陰其下地
坐黃冠師山行倦日
永聚話遂忘疲行看
洞中境都是寂音詩

湘上閒居

夜清暑雨過四壁草蟲鳴一枕幽人夢半窗閒月明摧
頽弘法志老大住山情忽憶陳尊宿宿編蒲度此生

西齋書卧

餘生已無累古寺寄閒房睡足無來客窗空又夕陽叢
蕉高出屋病葉忽飄廊起探風簷立飛蚊避晚涼

秋夕示超然

夜色已可掬林光翻欲流一鈎窺隙月數葉攪眠秋清
境扶歸夢殘缸替客愁搜詩時畫席忽覺此生浮

次韻真覺大師瑞香花

淺色映華堂清寒熏夜香應持燕尾剪破此麝臍囊有
恨成春睡無人見洗粧故山煙雨裏寂寞為誰芳

除夕和汝楫

今夕非常夕人偏故國思不堪槎凍耳聽誦未歸詩近
市諠譁後深簷雨雪時爐香待清旦此意有誰知

清明前一日聞杜宇示清道芬

籬外花如海閒軒小寢驚最先聞杜宇更覺近清明雲

怒知為雨風和拗得晴阿芬甘劣我笑裏恰詩成

次韻雲菴老人題妙用軒

開軒閒隱几萬象競趨陪風揭松聲去雲推山色來
觀身真作夢視世一浮埃日暮庭陰轉幽禽接翅回

送僧歸故廬

投名身入社卧病偶思歸渡澗脫芒屨扶藤下翠微寒
松猶帶雨瘦骨不勝衣若見空鑽紙當施百丈機

焦山贈僧

對牀聽夜雨佳約是當年放曠隨緣去閒心不習禪倚
蒲趺足坐擁衲蓋頭眠今識君歸處齋餘有澗泉

宿本覺寺

一宿路旁寺霜清夢亦寒憶曾游覽處來覓舊題看病
衲成新塔層樓隱敗垣青山猶不老千疊似翔鸞

重會雲叟禪師

氣味似前輩見之長眼明閒須研法味老不減詩情草
聖因蛇鬪禪枝解虎爭一堂聊寄傲疎快餞餘生

早登澄邁西四十里宿臨皋亭補東坡遺

天下至窮處風煙觸地愁村鷓聞捉拗岸汁駭西流鳥
道通儋耳鯨波隔萬州赴雞行落月悽斷在蠻謳

過凌水縣

野徑如遺索縈紆到縣門犁人趁牛日蜚戶聚魚村籬
落春潮退桑麻曉瘴昏題詩驚萬里折意一消魂

渡海

萬里來償債三年墮瘴鄉逃禪解羊負破律醉檳榔瘦

盡聲音在病殘鬚髮荒餘生實天幸今日上歸艍

次韻鄧公閣睡起

歸計寬為約山行短作程
旅亭驚午夢布穀正催耕
翰墨為生事雲泉負此生
一篇敘閒適細味有餘情

次韻衡山道中

嶽色墮馬首嵐光忽滿襟
眼寒知意適句苦覺愁侵
沃野獻新綠殘晴釀晚陰
天涯驚去雁料理欲歸心

次韻李方叔遊衡山僧舍

道鄉見城郭世路謾升沈寺勝增佳氣壁間餘醉吟僧
殘過客少山好為誰深寧識通泉尉獨懷經濟心

題夢清軒

小軒人不到修竹過牆生眼倦經長掩身閒夢亦清微
風吹篆縷活火潑茶鐺遙想佳眠夕蕭蕭雨葉聲

留題三峰壁間

三峰稜層如削玉一派懸泉瀉寒綠平生山水性貪婪
聊與白雲相伴宿松風竹露有餘清夜伴孤月依簷楹

神凝氣爽睡無夢不聞樓上霜鐘鳴

至豐家市讀商老詩次韻

楊柳護橋春欲暗山茶出屋人未知
冒田泱泱走流水
婦子鏟塍翁夾籬雪晴春巷生青草
煙濕人家營晚炊
心疑輞川摩詰畫目誦匡山商老詩

卧病次彥周韻

卧便午簟祛殘暑誰令殿閣風鷗語
君來談笑破岑寂
慰此經旬攜手阻湘山解事不須招
數峰入座爭翔舞

心知清境世不要勝踐從來數支許

王仲誠舒嘯堂

隔岸暮山秋翠重少馬月作冰輪湧閒披白恰登此堂
絳闕神清氣深穩此中不著絲竹耳但覺清圓林葉動
恐君夜殘亦仙去棄米叫雲空目送

和忠子

牛車注經宗兩角那問虛舟移夜壑竹間掃除聞磬聲
戲作伽陀歌獨脚心波不興類古井情緣脫盡如遺籜

高笑癡兒倚富貴危如乳燕方巢幕

遠浦歸帆

東風忽作羊角轉坐看波面纖羅卷日脚明邊白鳥橫
江勢吞空客帆遠倚欄心緒風絲亂蒼茫初見疑鳬雁
漸覺危檣隱映來此時增損憑詩眼

山市晴嵐

宿雨初收山氣重炊煙日影林光動蠶市漸休人已稀
市橋官柳金絲弄隔谿誰家花滿畦滑唇黃鳥春風啼

酒旗漠漠望可見知在柘岡村路西

江天暮雪

潑墨雲濃歸鳥滅魂清忽作江天雪一川秀發浩零亂
萬樹無聲寒妥帖孤舟卧聽打窗扉起看宵晴月正輝
忽驚盡捲青山去更覺重攜春色歸

洞庭秋月

橘香浦浦青黃出維舟日暮柴荆側湧波好月如佳人
矜誇似弄嬋娟色夜深河漢正無雲風高掠水白紛紛

五更何處吹畫角披衣起看低金盆

瀟湘夜雨

嶽麓軒窗方在目雲生忽收圖畫軸軟風為作白頭波
倒帆斷岸漁村宿燈火荻叢營夜炊波心應作捕魚兒
絕憐清境平生事蓬漏孤吟曉不知

煙寺晚鐘

十年車馬黃塵路歲晚客心紛萬緒猛省一聲何處鐘
寺在煙村最深處隔溪修竹露人家扁舟欲喚無人渡

紫藤瘦倚背西風歸僧自入煙蘿去

漁村落照

碧葦蕭蕭風浙瀝村巷沙光潑殘日隔籬炊黍香浮浮
對門登網銀戢戢刺舟漸近桃花店破鼻香來覺醇醖
舉籃就儂博一醉卧看江山紅綠眩

穎皋楚山堂秋景兩圖絕妙

溪邊兩鴨自夫婦生而能言似相語婦先浮波喜轉顧
夫欲隨之竟先去水際青蘋各占叢風撼荷花已退紅

不見清香雲錦段空餘霜葉伴枯蓬

山寺早秋

千本蒼杉俱合抱夕陰相映寒蟬噪殘僧獨歸清入畫
秋色滿庭濃可掃霜鐘初歇月未生但覺篝燈一點明
階除環佩走流水樓閣誦經童子聲

余還自海外至崇仁見思禹以四詩先焉旣別
又有太原之行已而幸歸石門復次前韻寄
之以致山中之信云

脫枯寧知縛禪律但欲閉門長不出死禍平生九蹈之
痛恨防身苦無術此言了如意在絃此心炯如月臨泉
山中樂可驕稚世一榻暑風清晝眠

信上人自東林來請海印禪師過余湘上以贈
之

五湖東歸風轉柂柔櫓聲中飛鳥過開篷不信是廬山
忽驚落瀑從空墮道人箇中三十秋那知今始載歸舟
白藕池邊月初吐應對隣房說舊遊

十五日立春

千年像教唐朝寺雪後新年晴復陰
殘僧無事春又至
遊客不來山自深
長廊掃葉望空翠
小閣卷經橫水沈
三生白業有言說
一念淨心無古今

晚步歸西崦

庭除有路入深壑
曳履脩然獨往還
布穀風光寒日近
摘茶時節亂山間
花枝重少人甘老
燕子空忙春自閒
歸晚斷橋逢野水
更能揜手弄潺湲

訪鑒師不過書其壁

獨自來遊微雨後道人乞食及清晨應門童子能迎客
滿地榆錢欲買春花醉發狂風日躡柳眠喚起景光新
政當借榻酬無事熟軒從教聒四隣

晚秋溪行

熟路沿溪過石橋掃除秋晚淨迢迢幽尋忽見蘭芽茁
小立仍逢柿葉飄撲水飛雙去鳥玲瓏山響一聲樵
歸來半掩殘經在燕寢香凝碧未消

夏日偶書

碧縷橫斜試水沈紅腮甘冷嚼來禽含風廣殿聞棋響
轉日迴廊暗柳陰強撚冰紉餘睡色倦憑棐几適閒心
攀翻浣衲黃塵事過眼雲蹤不可尋

竹爐

博山沈水覺塵埃旋斫凌雲綠玉材自拭錦裯含淚粉
要焚銀葉返魂梅意消未掩黃庭卷火冷空餘白雪灰
應把熏衣閉深閣流蘇想見畫屏開

寄草堂上人

首夏年芳尚可尋興來芒屨恣登臨
回頭故國煙波濶分袂幽人歲月深
落日杜鵑山館靜熏風芳草柳塘陰
知君宴坐忘機地謾寄新詩話此心

題水鏡軒

小軒明快照巖阿得道幽人喜氣多
但視世間如水鏡方知夢裏有山河
佳眠不礙林光入清坐何妨夜月過
我亦思歸老丘壑結隣西崦肯容麼

石臺夜坐

故鄉乃有此叢林下板何妨著寂音永與世遺他日志
尚嫌山淺暮年心凍雲未放僧窓曉折竹方知夜雪深
琢句自應清似玉更宜坡字硬黃臨

九峰夜坐

千峰萬峰自雲雨一宿兩宿心頽然不知人間歲云暮
但覺澗風吹夜泉地爐火燄水正泣篝燈委昏僧未眠
古人去我不甚遠何必想像臨遺編

寄李大卿

瓶盃又復寄西州
彌勒同龕古寺幽
睡起忽殘三月夏
朝來拾得一簾秋
浮雲世事慵料理
斷梗閒蹤任去留
投老山林多勝概
杖藜何日復同游

秋日還廬山故人書因以為寄

風葉鳴廊夜色晴
隔雲微月稍分明
下簾徒怯衣裳薄
拂榻空驚枕簟清
病眼得秋還少睡
壯心于世尚多情
何時却作廬山去
渡水穿雲取次行

誠上人求詩

我昔車輪翠裏行，只今懷想似前生。
那知古寺僧窗下，偶見高人眼倍明。
秋月半鉤留客意，凍雲千頃欲歸情。
杖藜笑出千峰去，添得蒼崖響答聲。

懷友人

尋常輕別尚消魂，何況交情過弟昆。
孰謂此身閒日月，自慚疎跡信乾坤。
泠泠小雨江邊路，薄薄浮煙竹外村。
回首舊游方契濶，孤舟何處宿黃昏。

送軫上人之匡山

何處高人雲路迷相逢忽薦目前機
偶逢菜葉隨流水知有茅茨在翠微
碎瑣夜談皆可聽煙霏秋嶺欲同歸
脩然又向諸方去無數山供玉麈揮

與晦叔至奉新

欲去未成還執手西風疎雨晚絲絲
暗驚歲月行飄忽那更人生苦別離
君已嘔心工筆語我今歸計老茅茨
冷齋後夜誰同宿莫向燈前讀此詩

送敏上人

殘林病葉強翻紅已覺清秋夜氣濃
懶復小窗邀獨秀却應歸夢挂雙峰
水分淮甸當懸席路遶匡山可振筇
若見虎溪谿上月為言相憶作衰容

贈王司法

輕帆已有渡江期高會清游惜此時
水閣颺煙晴試茗雪窗敲燭夜論詩
衝寒遠雁來橫浦弄色新梅半糝枝
林下自知無一事亦應風月動關思

次韻超然

翠寒空覺此生浮。歲月催人髮易秋。忽憶倚天廬嶽去，
更尋清境武林游。情深愧與高人別，興發徒煩夜月留。
他日西湖遠相憶，為君言笑散沙鷗。

次韻超然竹陰秋夕

月脇雲行夜未深。滿庭風露葉辭林。知誰牆外千竿竹，
分我窗西一畝陰。山好已無歸國夢，老閒猶有讀書心。
剩題詩句酬幽隱，歲月翩翩接翅禽。

廬山寄都下邦基德祖諸故人

勢占江南三百里煙霏相映出層樓
芒屨竹杖山兼水坐看行吟春復秋
浮世萬途成底事吾生一飽更何求
故人京洛風埃地能信山中此樂不

送宗上人歸南泉

燈外佳眠試冷齋欲成歸夢暗驚回
一軒秋色侵衣重半夜波聲拍枕來
江國潮平人獨渡海山家在意徘徊
倚藤明日秦淮上看子風帆十幅開

晚坐藏勝橋望石門

好山千葉青蓮曉斫額令人意已消微出樓臺知有寺
倦行雲樹忽逢橋此生未覺叢林負肯處真教日劫超
閒拾墮薪成淺立細泉幽澗響寒蛸

送隆上人

人生聚散等兒戲夢境紛然此一時老去漸知為客味
秋來長作送人詩感君義色分心曲慰我年華兩鬢絲
想見故鄉霜菊後屋頭千樹橘纍垂

上元宿百丈

上元獨宿寒巖寺卧看篝燈映薄紗
夜久雪猿啼嶽頂夢回清月在梅花
十分春瘦緣何事一掬歸心未到家
却憶少年行樂處軟紅香霧噴京華

宿靈山示月上人

地靈形勝自天成山色溪光潑眼明
北岫飛來么鳳落東隣相去一牛鳴
霜筠遶寺秋無數壁月臨軒夜更清
已約高人結蓮社他年香火寄餘生

宿鹿苑書松上人房二首

數峰煙翠疊黃昏忽見松間窈窕門
好境未將佳句寫幽懷先與故人論
隔林每恨音容阻此夕相逢笑語溫
雪意不成應有月夜深回看湧金盆

冷齋託宿自攜衾卧聽松風度栗林
黃卷青燈紙窗下白灰紅火地爐深
夢回清響春巖溜夜久幽香噴水沈
慣作橫刀眠下板為君今有住庵心

次韻王節推安道見過雲蓋二首

湘山名與故山齊寺在沙村斷岸西
繫馬槐根秋雨歇
倚欄雲際暮猿啼
公宜談笑光臺閣
我合摧頽老澗谿
袖有新詩如瀉出
逼人神駿不容羈

睡起春衫取次披
髻雲隨從倚欄時
生憎柳底鶯聲巧
不分花前日影移
伊昔笑來憂易老
而今思去恨難追
林梢懸挂團團日
無語東風玉箸垂

題草衣巖

鉏頭為枕草為氊
曾與高人說任緣
豈料大嫌沽世價

未應虛費買山錢，閒編木葉輕于紙。
細茸蘆花軟勝綿，石室至今增壯觀。
可知千載得人傳。

送僧歸筠

西津渡口唐朝寺，到眼瀟湘厭飲看。
誰遣松聲環坐榻，更令嶽色墮欄干。
君如鳥倦今知返，我與鷗盟久已寒。
想見若耶溪上路，正當蘆橘帶甘酸。

宿臨川禪居寺書方丈壁

雨過沙村繫客船，行間樓殿帶晴煙。
夜深霜月涼于水。

門外雲濤遠際天禾稻豐登如棄土菱蓮甘美不論錢
好峰不住猶行役忽憶鐘山掬澗泉

次韻信民教授謝無逸游南湖

春游每覺客愁消最愛晴湖漲柳橋鴨綠皺寒初拍岸
鷺黃照影自垂條惱人風物今如許著意春光已不撩
但得與君同一醉何辭日日作詩招

崇仁縣與思禹閒遊小寺啜茶聞棋

平生閱世等虛舟臨汝重來又少留攜弟共逃三伏暑

入門先得一軒秋，隔牆晝永聞棋響。
陰屋涼生見樹幽，又值能詩王主簿。
飯餘春露啜深甌。

海上初還至南嶽寄方廣首座

天風吹笑落人間，白髮新從死地還。
往事暗驚如昨夢，此生重復見名山。
倦禪想見堆危坐，知法應拋放縱閒。
初嚼芳鮮動詩思，一篇先寄倩君刪。

至筠

乞漿問路到筠溪，天氣清和得所宜。
父老相逢班草坐，

風光初過採茶時
摩挲禪榻營春睡
想像齋厨辦晚炊
白首不知丘壑走
壁間來讀舊題詩

示超然

秋光滿鬢萬事死
慚愧眼明牙齒牢
野寺閒眠聽風雨
海山猶夢渡雲濤
事非白傳方驚鼎
迹隱庖丁已善刀
一徑莓苔三十載
偏容此老擅竒豪

懷李道夫

半篙晚漲綠楊灣
接翅鷗歸霧雨殘
數疊吳山圓楚夢

金少卿集卷二十六
一番花信釀春寒別時小語依然在隔歲來書展復看
補袞胸中五色線只今應作怒蛺蝶

立春前一日雪

明日立春今日雪雪中殘響滴虛簷方增謾說寒威在
不絕潛和暖氣添客去旋開書對語閒多偏與懶相兼
湘山自古愁眉淺縱御鉛華不到尖

效李白湘中體

夕光江搖魚尾紅何處扁舟開晚蓬雁字初成春有信

煙鬟空好雨無蹤
荒寒數葦橘洲岸
領略半窗湘寺鐘
浦口行人已爭渡
林下歸僧欣一逢

次韻寄傲軒

道逢飛鳥倦知還
一鉢安巢又故山
無累自然增逸興
有名終恐廢長閒
背時生計風煙上
隨意園林指顧間
應笑市朝爭奪者
暗驚清鏡失朱顏

次韻宿東安

淡雲踈月兩微茫
獨酌沽來竹葉香
已把功名比雞肋

更驚世路似羊腸
心情老去俱消盡
詩律年來覺倍強
解誦賓州侍兒曲
此身安處是吾鄉

次韻宿清修寺

湘山也學廬山好
雙瀑飛聲繡谷風
正欲歸來向人說
戲將收拾入詩中
浪驚醉枕寒松響
春滿茶鐺活火紅
清景骨飛嗟未到
故應惟許夢魂通

次韻彥周見寄二首

詩先春色附湘船
來與幽人結淨緣
句好空驚碧雲合

韻高疑在白鷗前君應歸誦陶彭澤我亦南尋魯仲連
想見江頭同握手採茶時節雨餘天

歸思啼禽日夜催寶書臨罷意徘徊榆錢滿地買春去
嶽色渡江排闥來行樂風光清夢曉卧披煙雨曲屏開
興來敏速詩千首落筆人驚挾怒雷

二月大雨江漲晚晴作

投老歸來楚水濱水清聊可濯衣塵拚心樂事都還汝
入手清閒不與人尚有笑談消白晝更無情緒管青春

暗驚少日王城外走馬爭先看寶津

題天王圓證大師房壁

閉戶不妨依聚落開軒隨分有山林
殘經半掩世情斷好鳥一聲村意深
籬外風筠森束玉屋頭霜橘欲垂金
能營野飯羹紅醬渡水何辭數訪尋

題雲巖筠軒

雨葉風枝小徑通拂砧清坐有誰同
粉衣香滑秋叢瘦泉珮丁東夜壑空
半世已歸彈指內前途都付枕肱中

隄防老境猶多事折脚鐺炊腐顆紅

上元後候季長不至作此寄之

和風凍雨上元後斷岸橘洲春水生村寺獨歸江路熟
竹籬誰繫小舟橫偶成詩句長哦罷謾折梅花一嗅清
想見連牀成夜語此篇先慰遠來情

大雪

今年未雪今日雪地迫眼新人不囁永巷掃除聞屐
響暮林翔集看禽嬌韻高雒下應難畫興發山陰未覺

遙想見茅齋已摧壓曲肱清夢到山椒

宿資欽楚山堂

故人持節在三湘白首相逢話更長
挂錫曾憐道林寺攜琴來宿楚山堂
意消忽覺風敲竹夢斷空驚月轉廊
常恨出門無所詣敢辭此夜更連牀

題胥大夫欣堂

議郎和粹色無求繞屋江山秀氣浮
弱柳貪眠禽喚起異花含笑草忘憂
閉門不放青春返解榻長令佳客留

摹寫高情無好句謾橫詩眼付冥搜

正月一日送璿維那之新昌乞

春水初生湘岸邊陰晴城郭上元前
暖消積雪成簷滴火烈殘香發篆煙
念舊十年鄉井夢試新佳句贈行篇
條然路入江南去想見歸時及杜鵑

雪詩

千巖雨雪黃昏後一室香燈一寢餘
此夕鄉關入歸夢明朝雲物記曾書
地鑪不獨聞瓶泣山果時驚落屋除

清境鼎來勞應接暮年生計未全疎

送海印奩老住東林

湘容嶽色中秋後古寺閒房小寢餘
掃徑帚粘新落葉
開窗風掩讀殘書
吹雲又作他山去
種漆何時伴我居
洞上閒名猶在世
未應容易與人除

余在制勘院畫卧念故山經行處用空山無人

水流花開為韻寄山中道友

今選得三絕

掃徑偶停帚幽懷凝佇間
暮樵迷向背餘響答空山

其二

新晴收雨脚宿霧隔花身
睡美不知曉啼禽解喚人

其三

舍南一曲溪春漲半篙水
去作落崖聲雪花濺山翠

粹中自郴江瑩中與南歸時
余在龍山容泯齋為誦唐詩
入郭隨緣住思山破夏歸之
句為韻

哀蟬滿風聽草樹初茂密
空齋有奇事屋角寒藤入

又

松下竭來見依然冰雪顏未須驚世故且復卧看山

余所居竹寺門外有溪流石橋汪履道過余必
終日旣去送至橋西履道誦笑別廬山遠何
煩過虎谿之句作詩以見寄因和之

吾廬亦何有草屋八九間牀頭挂濕水枕上見他山

履道書齋植竹甚茂用韻寄之

曉庭蒲葉翻天涯歸夢遠尚記泊舟時隔水桑婉婉

送實上人還東林時余亦買舟東下

世事但堪眼見此生何殊夢游未倩青山掩骨且牽黃
衲蒙頭

說盡廬山勝處寂然相對無言東崦峰頭月出依約如
聞白猿

誦高僧詩云沙泉帶草堂紙帳卷空牀靜是真
消息吟非俗肺腸園林坐清影梅杏嚼紅香
誰住原西寺鐘聲送夕陽作

林外鳴鴉零亂山頭落日微紅樓臺迥然暝色谷幽已
答疎鐘

臨清閣

邑勢自然藏勝江空表裏含秋夜棹近人明月襄陽應
在漁舟

贈誠上人

對書只圖遮眼題詩何必須編且看無情說法羣山雪
盡蒼然

讀古德傳

車輪峰作碧螺旋不用招邀自滿軒等是世間無用物
故宜相對兩忘言

合妙齋

未饒拄杖挑山衲差勝袈裟裹草鞋吹面谷風衝虎過
歸來松雨撼空齋

注十明論

了知無性滅無明空慧須從戒定生頻呼小玉元無意

只要檀郎認得聲

袁州聞東坡歿于毗陵書精進寺壁

濁世肯留竟何意玉芙蓉出於泥中誰謂秋來亦零落
病收衰淚泣西風

無盡見和詩復次其韻

一丘一壑思迢迢莫把山林較市朝江上相逢兩無語
夕陽衰草暮蕭蕭

瑩中南歸至衡陽作

回雁峰前醉眼醒
卧看波影蘸空青
起來一笛春風晚
萬里無雲月滿汀

寄石頭志菴主

世途嶮巇鼻先酸
折脚鐺尋穩處安
誰見睡餘閒振策
松風吹耳夜濤寒

余將經行他山德莊自邑中馳詩見留是夕胡
彦通亦會二君子談達旦不寐明日霜重共
讀蔡德符兄弟所寄詩有懷其人

風徑霜清拾墮薪
野炊童子解經營
脩然放箸秋窗晚
籬落淒清屋角晴

僧從事文字禪

三多授子文章法
壞衲酬吾老大心
簾捲暮涼煙翠重
一聲雲斧覺山深

超然在東華作此招之

芒屨踏破成何事
坐榻塵埋只汗顏
齋鉢生涯惟澗飲
結茅終待老鐘山

至邵州示胡強仲

平生厭飲水雲間
老景優游剩得閒
遠謫瘴鄉君勿歎
天教更看海南山

煙寺晚鐘

輕煙罩暮上黃昏
殷殷疎鐘度遠村
略約橫溪人迹靜
幡竿縹緲插山根

平沙落雁

寂寞蒹葭亂晚風
江波斂灩浸秋空
橫斜倦翼歸何處

一點漁燈杳靄中

春詞

映門楊柳未全遮
乍放柔條自在斜
不信春寒猶有雪
誤驚飄舞作飛花

其二

曉霽晴湖已拍橋
橋邊春色解相撩
分疎積雨饒鶯舌
拘束東風倩柳條

其三

郊原雨歇看春耕
繭栗能馱稚子行
山杏欲嘗猶苦味
海棠開徧恰新晴

殘梅

殘香和雪隔簾櫳
只待江頭一笛風
今夜迴廊無限意
小庭疎影月朦朧

次韻通明叟晚春

琴筑春流漲淺灘
圓吭幽鳥語林端
纖蒲水荇空淒寂
背立東風整釣竿

其二

山桃噴火柳垂絲野店溪橋處處宜
我作春游亦清散
榆錢聊挂瘦藤枝

其三

楊花滿院掩深闌半摺文書偃卧看
幽鳥等閒回睡眼
暖風時復破春寒

其四

春寒瘦骨病難禁多謝新晴霽晚霖
自補衲衣矮窗下

黃鸝聲好屢停針

遊西湖北山二首

幽草青青繞竹扉
雨餘人在杏園西
無端黃鳥驚春夢
正向綠蘿深處啼

春園南北笋過牆
牆下離離草更香
啼鳥野花無問處
蒼山牢落下殘陽

次韻超然春日湘上

暮年身世極南邊
病眼愁看北客船
憶著金明池上路

寶津晴瓦隔霏煙

春晚

方見柳條堪結紐
忽驚梅葉解藏禽
春歸掣肘徑不住
院落殘紅一寸深

初夏

院落寥寥日正長
小梅初熟亞枝黃
午窗書引昏昏思
角簾宜開舊竹牀

新竹

琅玕數本倚牆陰
新筍均條忽作林
昨夜小軒添得境
却煩佳月碎篩金

秋晚

碧雲紅樹晚相間
佇立不堪游子情
劃破秋空一行雁
斷腸南去兩三聲

又

紫梨紅棗八九樹
竹屋柴門三四家
機杼聲遲秋日晚
遶籬寒菊自開花

次韻

懷中但自除衣垢面上從教有唾痕
負日風檐成坐睡
夢隨鷗鷺浴江村

其二

莓苔徧地榆錢滿院落無人
柳絮飛信手翻書香篆冷
夕光山翠上窗扉

其三

措置已落古人後猛省令人愧
衲裙廬山好處軒窗在

留眼歸看五老雲

次韻吳中見寄

停蓄幽懷萬頃陂一傾要及少年時正當清嘯尋君去
已辦登山綠玉枝

謝人惠蘆雁圖

道林煙雨久不到忽見橘洲蘆雁行笑裏筆端三昧力
坐中移我過瀟湘

湓江宿舟中

琵琶亭下孤舟宿夜靜風清水四圍
蝴蝶夢中江月白
蘆花鳴笛釣船歸

東流阻風

秋葉叢邊風索索迎賓亭下水瀾瀾
蓼花深處老漁父
更把牀頭羌笛吹

過湘江題慈雲寺壁

慈雲寺在古城隈月閣風軒照水開
獨倚欄干秋雨後
青山相逐渡江來

次韻亭上人長沙雪中懷古二首

楚國樓臺凌九霄
軟風行復弄柔條
當年絃管今何處
飛雪滿空如舞腰

數峰江上曉不見
指點先煩柳標條
却望蒼崖尋折幹
偃松稍重壓龍腰

過長馬市

長馬人家古道旁
秋來禾黍已登場
池塘水淺菱蒲冷
籬落霜晴橘柚香

題通判學士適軒

小軒只著竹匡牀散髮陶然夏簟涼手倦拋書成午睡
夢回雙頰帶茶香

書湛然亭

家在匡廬疊翠層雲開彷彿見微稜褰衣欲上千巖去
隔岸扁舟喚不應

送覺先歸大梁一首

殘秋千里游梁去破浪扁舟別我來對坐無言看山月

一庭松雨在莓苔

永固登小閣

老僧乞食城郭去小閣無人獨自登
急雨忽來添暝色諸峰領略露寒層

舟行書所見

剩水殘山慘澹間白鷗無事小舟閒
箇中著我添圖畫便似華亭落照灣

次韻春風

吹鬢風俱小雨來殘紅掃盡露蒼苔稻畦綠錦無邊幅
更欲煩君為剪裁

次韻西樓

萬古湘江繞故城水光斜照動檐楹行人仰看春風軟
吹落凭欄笑語聲

又登鄧氏平遠樓縱望見小廬山作

倚欄天際數歸帆春在滄洲數筆間我與小樓俱是畫
雨中猶復見廬山

贈覺成上人

雲泉措置萬事外
鬚髮凋零伸欠中
想見龍城山下路
一川秋色稻花風

次韻惠梅禪師見寄秋日

飽霜毛穎泛松煤
窗底魚牋自在開
琢得小詩清似玉
步筇時遶紫莓苔

與超然至谷山尋崇禪師遺踪

行盡湘西十里松
到門却立數諸峰
崇公事跡無尋處

庭下春泥見虎蹤

送道林

楞伽本在海中央鉢具懸知挂舊房
不泛木杯驚俗眼一簑煙雨渡瀟湘

題清芬軒

隔屋江梅欲墮飄幽香細細故相撩
披衣春曉無人見小立微聞意已消

次韻曾機宜遊山湘江晚望


貪看江草間江花不覺移舟著淺沙
數筆瀟湘春自曉
橘叢籬落露人家

廬山雜興

別開山徑入松闌
半在雲間半雨間
紅葉滿庭人倚檻
一池寒水動秋山

道中

蒲柳冥冥花已殘
水田南北是青山
晚村歸路聞啼鳥
家住寒雲縹緲間



石倉歷代詩選卷二百二十六